

LA USC DI LADINS - VENERDI' 17 LUGLIO 2020

PERSONES

La speranza de Ierma se à destudà

L tumor à abù la venta su la brava scritora, autora del liber «La pazienza di sasc» che aane cognosciù te Fascia l'an passà en ocasion de l'Aisciuda Ladina



Ierma Sega l'an passà te Fascia en ocasion de la prezentazion del liber «La pazienza di sasc».

L Trentin à perdù na gran persona, na scritora de gran braùra e sensibilità, na mère e na femena con gran forza e coraje, na giornalista, insegnanta e persona de cultura ascorta e motivèda, che à dat n gran contribut a sia comunanza.

Ierma Sega la era da Roveredo e enstadi l'ha cognù zeder a la malatia

che l'aea ciapèda ite jai egn, a chela che però l'ha semper sapù e volù ge fèr front con coraje e serenità: n coraje e na serenità che la ge à passà ence a chi che l'aea apede.

Te Fascia l'ha cognosciuda per «La pazienza di sasc», n liber che per endrez di Servijes linguistics del Comun General l'è stat traslatà ence per ladin e che l'era stat prejentà de mè del 2019 te Museo Ladin tel chèder de l'Aisciuda Ladina.

Te «La pazienza di sasc» Ierma Sega, col didament di bie dessegnes de Michela Molinari, volea didèr si fies, e duc i fies, a tor dant e ge fèr front a na situazion pesoca descheche l'è chela vivuda da n bez canche n genitor se mèla de tumor. N argoment emportant e delicat, e per chest l projet aea abù ence l sostegn di Servijes Sozièi del Comun General.

L bez protagonist del liber, Luca, l mena i picoi letores a cognoscer l percors vivù da el e da sia familia canche sia mère la se mèla e la vegn curèda, dut vedù e contà con si eies e sia raprezentazion da bez. Chest tem tremendo vegn tratà con gran sensibilità e atenzion, duran la paroles dretes, zenza ge sùrèr dintorn e zenza chierir de sconer nia, con la consaputa

che vegn da chi che chest percors l'ha vivù sun sia pel, ma ence con n fort message de speranza.

«Chest liber – l'aea dit Ierma Sega endèna la prezentazion te Fascia–l'è nasciù da na esperienza de vita che me é troà a viver en pruma persona, no saee coche aesse podù la tor dant e coche aesse podù la spartir con i fies. No aee troà n liber adatà che ge rejonasse e coscita é capì che aesse podù l fèr gé, che vegnie dal mond de la scrittura. I protagonist è doi frèdes che à tedant na lingia de tapes da passèr via ensema a si genitores, ma soraldut a sia mère malèda, na lingia de avvenimenc che li compagna sul troi de la speranza, e bele prest l peis di sasc ge lascia lèrga a de bela piantes fiorides.» La speranza ampò ades se à destudà, per Ierma e per si fies. A chi che l'ha cognosciuda ge resta l recort de na persona spezièla, descheche à testimonià la gran partezipazion a la manconia. Ai etres ge resta si scric, prum de dut «La pazienza di sasc», testament prezios che palesa la gran forza de la speranza, che soraviv ence a la mort.

Lucia Gross